

Kayëta ixinëm ir Bëtesalonik in Lilaya in

Akayëta aŋo ro Pol yëgwën babi bëte okëreceŋ od gër Amara and Tesalonik ok. Ebi pënixën ŝenene end omakaw ond Yesu Kërisët eŋ. Okëreceŋ odëmar na gër Tesalonik, abani riyenind na gayik gogo ko bakaw Yesu Kërisët. Ebi wërëŝëtaxën, Pol yëgwën këbi mëne ðamana exo bakaxënëgu Yesu Kërisët, beŋo kë xuca pere gër ngwën: eyepan ed ekwëta ed Kaxanu el; gë cale ind enëgwëŝ in; gë eñëmbër ed betëmbak el; gë ecanayaw ed Arangoÿëra and Kërisët el. Do gayikako beŋo ax gi bana pere, okëreceŋ ok aÿap ÿap bax eni bayi ga këni riyenind këdi këno sëkwëran ala aŝëxe edëba edebën el.

Er ex gër akayëta in:

End ekemëna ed gër andiyen and Kaxanu eŋ:
1.1-12.

End eyepan ed Atëfëtan and Yesu Kërisët eŋ:
2.1-12.

End ekwëtaya ed Atëfëtan do gë cale eŋ: 2.13-
3.5.

End bërëwëk bëxwëlaraxik eŋ: 3.6-15.

Ofelar ol: 3.16-18.

Ecëmar el

¹ Wëno Pol, gë Silas, do gë Timote këŋun yëgwënëlin. Aŝëma këmun ŝëmand wën bër gër Amara and Bëtesalonik bën, amara and

xwën këni Kaxanu Faba irebi do gë Axwën Yesu Kërisët aņ. ² Awa Kaxanu, Faba irebi do gë Axwën Yesu Kërisët, yëlëlenun oyekax ol do gë obetak ol.

End yatir kiti eņ

³ Bëmaŷe, cëkwayindëlemo din Kaxanu endewën eņ. Mondako ŷapëk gayikako ekwëta ed xwëta këno wën el do gë ebalër ed këņun balërënd el anëka dëņ kë rafënd. ⁴ Biyi cëņ gë onënga fo këmi reyarand endewën eņ gër bamara band Kaxanu gayik wën and mokemëna xemëna kën gër ekwëta. Bëte abuņa buņa kën ado ga rixëra kënun, do soro kën mbaņ. ⁵ Toro ind kën sorond iņo këbo wăsinënd mëne Kaxanu ŷenene ko xitind, do mëne wën bër ŷap këbi en gi gër owun or Kaxanu hi kën. Ata në end owun olo kën soroxënënd. ⁶ Enimin Kaxanu end ŷenene ko ri, aŷaŷën këbi ŷaŷën toro iņ bër këņun sorënënd gërëgako bën. ⁷ Bëte ŷenene fo ko ri ga racët racët këņun gër toro ene teyëtaxëne wën gë biyi yatir këni ŷanayaw elod gër orën gë panga iņ, Axwën Yesu do gë omeleka odexëm ok. ⁸ Er këni ŷanayaw gë angodux atëm enëbi nëpaxën bër aņo nang ex Kaxanu bën, do gë bër hëpëk eni ma end Atëfëtan and Yesu, Axwën arebi bën. ⁹ Ata kiti ind ŷap këbi iņ dëņ këbi hătënëgu: laņ këbi ŷana ebi bëlandërand, do eno nacëta din ir din Axwën an, mëņ ar gë panga ind gë enjaran an. ¹⁰ Eņo kë hi yatir ko bakaw. Ata aŷëkw këno ŷana eno cëkwënd bëwënëk bërëxëm bën, dek bër wăk endexëm bën ayas këno ŷana eņo yasënd. Ahixeli kën

hixelid ga wã kën ako end Kërisët eñ and wël kën osede orebi añ.

¹¹ Mëñ ex, biyi din këmum şalenënd. Axara këmo xarand Kaxanu, mëñ ar xwën këbo an, eñun dëca eni gi bela bër yap këbi aniyen and waceli këñun añ. Axara këmo xarand bëte eñun dëca gë panga indexëm in en koraxënënd en di oyekax or ex yo, do andiyen and gë ekwëta and ex yo. ¹² Ata bela bën në endewën këni şëkwaxën owac or Yesu, Axwën arebi ol, do enun pëb wën bëte në endexëm. Mondako kë hi beño dek në end oyekax or Kaxanu do gë Axwën Yesu Kërisët.

2

End emëş epelatar eñ

¹ Axara xara këmum bëmaşe, end yatir ko bakaw Axwën Yesu Kërisët eñ do ang këne barëre ler gër ndexëm ak këmum xarand, ² këreñun yebud na aşand gër onden on-dewën. Ado enun pelënd mëne akey and ko bakaw Axwën Yesu añ anëka şatëguk ba enun pelënd mëne Kaxanu rek, eño këreñun tesënëd na. Bëte ado enun mëlanëli kayëta do eni dend mëne biyi yëgwënëli këñun, eño këreñun tesënëd na. ³ Ala këreñun yifad na gë təkërak. Gayikwa afo ex gi pere beki beño: eñanar eñ, bela bën eno mëşendëra xali Kaxanu; ekinëm eñ, exo canayaw Aşëñëanax an, ar fab këño enemi an. ⁴ Aşañëreli ar Kaxanu an exo do ayepën ko yepënënd dek er këni xëland bela in. Mëñ ex ar kë yëxw exo ñëpa gër lëngwe gër Aciw and Kaxanu do exo dend Kaxanu hi

ko an. ⁵ Kwitayin mëne afël bamun felënd eno and yeli bame gër ndewën aņ. ⁶ Wën aye nang kën er wedi këno gërëgako in, barikan așanaya ko șanaya and kë fiat akey andexëm aņ. ⁷ Awa anëka ŷanak kë șanayand eññënax end șonaya bax eņ. Barikan afo exo dëxëta pere ar këno wedind gërëgako an, ex canayaxën kerët. ⁸ Amëd aņo fo ko șanayaw Aŷëñënax an, do Axwën Yesu eno đaw ġe onjën ond kë șanënd gër etëŷ edexëm oņ, yatir ko bakaw. ⁹ Er ko șanayaw Aŷëñënax ajo ġe panga ind Sindan in đek, exo dind becarax, bananganëme, do ġe bërëcaxik bend ex yo ebi yifaxënënd bela bën. ¹⁰ Ģe đek banjifa band osëmbak baņ këbi ŷana ebi nañëtënd bër nambërak bën gayik ani kwëtaya ex na gër oŷëkw aņana and đal and fexën dobi aņ. ¹¹ Mëñ ex, Kaxanu këbi lawëneliw panga ind kë nambelind in eni kwëtaxënënd enëġwëș eņ. ¹² Ata në eno këbi nëpaxën Kaxanu đek bër ħëpëk eni kwëta đal bën, do bër këbi nënganënd edi ed betëmbak bën.

End apexa eņ

¹³ Biyi cëñ, end wën bëmaŷe bënd ħan këñun Axwën bëño, aŷap ŷapëk mo cëkwand din Kaxanu. Gayikwa Kaxanu sana këñun en ġi bëŷanar gër apexa, gër oŷënëk or ko yëlënd Angoc Amënëk ol, do gër ekwëta ed đal. ¹⁴ En ġixën mondako ŷac këñun ġe Atëfëtan and nangën këmum aņ, en cotaxën bëte enjaran end Yesu Kërisët, Axwën arebi eņ. ¹⁵ Awa bëmaŷe, đëkayayin aye do tëfindën laņ bend

sëyali këmun hik gë etëy el, hik gë kayita ir yëgwënëli këmun in.

¹⁶ Yesu Kërisët, Axwën Arebi an dëñ, do gë Kaxanu Faba irebi, mëñ ar ñan këbo an, mëñ ar yël këbo në end oyekax orexëm ene cot ex eyar ejekax do gë ekapina ed din ir din an, yëlëlenun, ¹⁷ ojañ ok en kemaxën gër oñëkw gër edi ed enjekax end ex yo do en yeyanaxënënd enjekax end ex yo!

3

End cale eñ

¹ Bëmañe, end këme xor me de me ñataxën eñ ex, calenindënëbo biyi ex wëlixën nëmëc eyeyan ed Axwën ed këmi femërand el, do eni cëkwaxënënd bela bën ang gër ndewën ak.

² Karayindëno bëte Kaxanu ebo dacët gër otaxan od bela bëxeñax do bëyëñenax, gayikwa ax gi ex na dek fo şot këni ekwëta el.

³ Axwën an cëñ mokwëta hi ko. Axemën këñun xemën do axaxa këñun xaxa eñun beşaxën Añyëñenax an. ⁴ Ga bar këmi gë Axwën an fënixën këbo mëne wën në edi en, do ari kën ri bëte er këmun felënd in. ⁵ Axwën an wërëşëtëlexo oñëkw orewën oñ gand añana and Kaxanu do gër ebuña ed ko yëlënd.

End andiyen eñ

⁶ Ga re këmi bëmañe, gër oñac or Axwën Yesu Kërisët, nacëtayino imañe indewën ikwëlaraxik in xarak ax gi ex na ang sëyali këmun biyi ak.

⁷ Wën dëñ anang nang kën ang yapëk enëbo tëfëtëlinde ak gayik ami kwënda bana oxwëlar

and hi bami gër ndewën aņ. ⁸ Ciș wec bami riyeind kedi ko soro ala edëba edebi el xarak ami tēw ex na gë andebi dēņ mi yambëraxën. ⁹ Biyi dēņ yāndi babo mi dīyand mondako enëbo tēfëteli xënënd xarak enimin aņap yāpëk enëbo dëband. ¹⁰ Enimin, and hi bami gër ndewën aņ, afel bamun felënd: «Angëmëne ala eņo key andiyen aņ, awa kërexo yambërand na.»

¹¹ Xarak anangati nangati këmi mëne na gër ndewën bërëmar bëxwëlaraxik exëni, yowey ani dind na ang ax gi ex na edilaya ed gër bend abi paß ex na el. ¹² Ata bëjo këmëni rend de, gër oñac or Axwën Yesu Kërisët, xara këmëni: diyenindëlexëni ang yāpëk ak eni cotaxën eyamb ed sëw këni gë andebën dēņ el.

¹³ Wën cēņ bëmaņe, këren tēkwëra na edi ed ang yāpëk el. ¹⁴ Do angëmëne ala exëna ar hëpëk er yëgw këmi gër kayëta ijo ro an, tisino aye, do kërëno barad na eņo cëfënanaxën. ¹⁵ Pelërayino ang imaņe indewën fo, bari kërëno nacëta na ang arangoņëra andewën fo.

Ofelar ol

¹⁶ Axwën an, mëņ ar gë obetak an, yëlëleņun mëņ dēņ obetak ol, nand ex yo, do ang ex yo! Awa Axwën an gilexo gë wën dek. ¹⁷ Ofelar ol cēņ, wëno Pol yëgwëlik gë ataxan andam aņ dēņ. Mondako këme ñatand dek okayëta band këme yëgwënd baņ.

¹⁸ Yesu Kërisët, Axwën arebi an, yëlëleņun wën dek oyekax ol!

Oniyan
Oniyan: Oniyan (New Testament+)

copyright © 2017 Wycliffe Bible Translators, Inc.

Language: (Oniyan)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

8b7902f3-5e35-5b89-86b2-c6da1be458b9